

五臺縣志 卷之八

藝文志

碑記


傳

墓誌

詩

藝文志

五臺山川甲勝名賢代興其著述流傳抑以備史
乘之遺著鼓吹之盛也志藝文



碑記

重修南神廟碑記

朱進士孫儼

邑之南十里有山層巒聳峙喬松茂鬱上有古祠俗謂之南神塙蓋漢文帝祠也按史傳帝高祖中子破陳豨軍定代地立帝爲代王呂后臨朝諸呂專恣大臣平勃慮危劉氏以帝賢聖仁孝聞於天下乃迎以奉社稷帝謙遜退避恭儉節用夙夜憂勤罔敢逸豫至於惜十家之產而罷露臺悲緹縈以除肉刑勸農桑以捐田租憫老幼而賜粟帛仁

施德布雖充溢宇宙其潛德發躍盡自代邑始
代地民祀以祠宜矣然邑地石焦瘠薄旱則易乾
水則易毀災則遽饑情則失業今闔境之民家務
和協人尙謙謹蓄害不作豐稔屢臻豈非帝之孝
道儉德芳烈未泯事有不便輒以利民猶常不忘
於今耶不然何安康富壽之如此也鄉人具祭祀
患不能有報虔者於是復新廟宇以祀之

楊公孝行叙

明大司馬

孫傳庭

公諱時倫字天叙號西泉五臺之百蘭里人先世

大同府朔州馬邑縣始祖有材徙五臺歷七代而
生海海生公賦性冲和制行惇厚雖農畝布衣而
一種純孝可風洵末季所罕覲者余與公長孫雅
稱莫逆交故乞文於余以誌墓余敢實錄焉公因
父疾禱於神願以身代持齋三載父疾果愈壽增
一紀事母勤視問供甘旨享年八旬有四其教子
也溽暑給饌太寒給薪歷久不厭是以夙無簪纓
而子伯仲全年遊泮叨廩祿歷選舉孫枝亦皆翩
翾翾起秀興未艾公將集全福於幽壤矣嗚乎終

身慕父母孝之長也一經訓子孫孝之永也異日
玉樹聯芳金章寵賁光前而裕後者孰非公孝德
所醞釀哉語云本固者枝必茂源深者派必長余
於公信之不誣已是爲記

明陽觀碑記

金進士
元好問

臺州西南八里紫羅山之麓有保聚曰明陽臺時
祠淨圖寺在其傍舊有道院廢之久矣欲修復之
而未暇全真師姬志元先住遼沁亦嘗留宿於此
父老愛其道行清實有尸而祝之之義乃築環堵

而居之三四年徙從之者益多思所復立壇宇嚴
規制設興遊居寢飯之所斧斤埏埴率其人目親
之前後十五年爲殿者三曰三清曰通明爲堂者
四曰三官曰四聖曰秘籙曰靈官門檻齋廚以次
而其請於燕京長春宮得額曰明陽此觀事之大
凡也臺州長茹君以贊其事翊而成之甲辰春史
館從事李君昂適携姬之徒王志寬過余讀書山
爲予言曰今吾桑梓鍊師吾方外友也明陽又吾
杖屨之所朝參者也姬知吾辱與子遊欲得子之

文以記其經度子寧有意乎予不敢辭乃爲記之
顧盼檀施四方來集土木成金碧之富鐘鼓狀雲
山之氣蓋未丐以歲月記圭於黃老之教久徒知
有之求所以尊師重道如供佛然者則無有其人
也兵劫之後此風故在獨鍊師一出州之人翕然
歸之雖穉子輩亦爲起信而起敬古所謂存乎其
人乃今見之夫物蔽於物曲屈則有不能通者此
二家之所以更爲盛衰耶吾於此有感焉三綱五
常之在猶衣食之不可一日廢今十室之邑豈無

知人倫之數也者至於挾免園策援童子學者乃
無一人焉寒不必衣饑不必食痛乎風俗之移人
也嗚乎二家之盛衰又何足記耶姬高平人卽公
嘗號爲崇道大師洞明子

重修廣濟寺碑記

明王源

縣治西鄰民居有古刹曰廣濟寺創造所自碑載
甚悉夫何歲月浸遠棟撓瓦落墻圯臺頽一望荒
涼難爲瞻仰矣前守是邑者因政煩事冗不遑是
念宏治丁酉歲孟夏山左陽信光侯奉命來守是

邑侯自下車以來興廢舉墜百度俱新一旦政暇
偕僚案蓮幕臨是寺召諸僧謂之曰汝等咸賴佛
教感人今如此坍塌無以爲人造福地何忍恣然
置之耶僧普然宗善感其言慨然應命於是邑之
士民若尙義陳山以靜輩各捐金易材傾者正之
朽者易之漏者葺之闕者補之金碧剝落者藻繪
之牖壁漫漶者泥飾之輪焉奐焉一復其舊足以
爲斯民造福居然一邑勝境而實由我光侯一命
之力是績也不歸侯而誰歸耶予惟佛教之興始

自漢明帝時西僧達摩入我中國彷彿吾儒說性
說心尤以生死輪迴善惡地獄果報爲言以故當
時人心翕然崇尚迄今熾然雖釋教固非吾儒所
宜言然就其所以爲教只是欲人爲善而已夫人
性本善但爲私欲汨蔽乃爲不善耳向使世之人
果因佛教感化於善則性善可復美俗可成雍熙
太和之世可致孰謂佛教不有益於人世乎哉自
茲以往爲普然宗善者尙當晨暮鐘鼓晝夜香燈
祝皇圖之有永祈聖壽於無疆豈徒被金縷袈裟

戴毘盧宗帽而已哉時因匆匆老衲拜請爲廣濟寺碑遂爲之記

均平永道碑記

明襄陽府推官
智幾先

五臺晉僻邑也滹沱爲帶環繞西南奔湧浩瀚地高而水下殊無補於灌溉北有泉巖河細流不及沱十分之一由郭家寨大興沛流於槐陰東冶等村洋洋浩浩頗大便利廼據上流鑿沙灘爲水地數日頻灌而膺朝廷重稅者坐視乾燥間有一溉則其借姻親也不則携雞酒而啗亡命豪雄也河

邊民徐光宇泣訴本道分數稍定楚人杜議日期
而里中豪橫益肆邑侯李公自陝右來守是邑胥
中涇渭分明有澄清蘆虎之志量地之多寡分水
之日期自上而下週而復始仍遣牌以巡守防河
上之元陌刻印以封提禁晨昏之盜決彈壓豪橫
之心杜塞後來之口郭家寨地三頃水一日大興
地八頃水二日半槐陰地十七頃水三日半東治
等村地三十二頃水六日一分派而三都稱便矣
偉哉偉哉昔西門豹治鄴十二渠邑人苦役豹曰

百歲後父老子孫思我當其苦勞費時沮者非一
不禁不撓渠竟就厥後漢長史以十二渠橋絕馳
道相近欲合二橋爲一橋父老不肯曰賢君之法
式不可改也豹借民之力興民之利民且永世不
諼矧公行所無事因民之所利而利之者乎若夫
善催征而鞭笞不用審均徭而頌聲交作招流亡
而集澤飛鴻撫邦屯而復邦啄鳥重根本則修學
校而設禹門雲路嚴保甲則繕城郭而建演武敵
樓葺社倉以預賑貸之所編保甲而串盜賊之禁

公皆行之而無難焉豈特分水一事哉予以爲分水一事非一時之利固貽萬世之澤者也於是敬爲之銘曰

華嶽之峯秀而巍黃河之水清而奇天以河山之秀氣流入李公心與脾去涇涉渭守臺邑沛乎德澤淵然思量地多寡分水期汪洋千頃誰及幾禹甸南山河洛思鄴守西門馬史紀祝公福壽多男兒臺人亦永有榮施

通濟橋碑記

明保定知縣

田龍

縣南有地名孤嶼溝距縣十五里其各府州縣往來賓旅暨本縣士民商賈莫不率由斯路是喫緊咽喉最要關津也無如山勢嵯峨水機澎湃履其地者率皆以跋涉爲苦舊架木以濟第顛險不寧且木易朽蠹豈不拔之基哉關中念公李父母蒞茲邑目擊此險卽勃然注念爰督義民劉道捐俸市材筮日鳩工從上徹下約三丈餘專用石條以鑿之橫順布之以石左右衛之以欄不兩月而厥工告成遠邇騰歡猗歟休哉此正所謂一勞永